

LIGJI Nr. 06/L-059

PËR KOMPLEKSIN MEMORIAL "ADEM JASHARI" NË PREKAZ

Kuvendi i Republikës së Kosovës,

Në mbështetje të nenit 65 (1) të Kushtetutës së Republikës së Kosovës,

Miraton:

LIGJ PËR KOMPLEKSIN MEMORIAL "ADEM JASHARI" NË PREKAZ

**KAPITULLI I
DISPOZITAT E PËRGJITHSHME**

**Neni 1
Qëllimi**

1. Me këtë Ligj përcaktohet statusi i Kompleksit Memorial "Adem Jashari" në Prekaz dhe obligimet e institucioneve të Kosovës për planifikimin, ndërtimin, mbrojtjen, konservimin, restaurimin, administrimin, kujdesin dhe prezantimin e tij.
2. Kompleksi Memorial "Adem Jashari" në Prekaz ka rëndësi ontologjike, antropologjike, historike, kulturore e qytetare për Skënderaj, Drenicën, Kosovën dhe tërë Kombin Shqiptar.

**Neni 2
Përkufizimet**

1. Termat e përdorur në këtë ligj kanë këtë kuptim:

1.1. **Zona e veçantë me interes shtetëror dhe kombëtar** - Sipërfaqja e përcaktuar si zonë e Kompleksit Memorial "Adem Jashari" në Prekaz, për qëllim të këtij ligji;

1.2. **Zonë e veçantë** - Zonë e identifikuar në Planin Hapësinor të Kosovës dhe Hartën Zonale të Kosovës që ka veçori specifike që kërkon një regjim të posaçëm organizativ, të përdorimit dhe mbrojtjes të zhvilluar nga Ministria përmes Planit Hapësinor për zona të veçanta;

1.3. **Kompleksi Memorial "Adem Jashari" në Prekaz** - Hapësira e zonës së veçantë me interes shtetëror dhe kombëtar, ashtu siç është e definuar me dispozitat e këtij Ligji;

1.4. **Shpronësim** - Marrja me kompensim real të pronave dhe ndërtesave private të cilat gjenden në hapësirën e Kompleksit Memorial "Adem Jashari" në Prekaz dhe kalimi i tyre në pronësi të shtetit konform dispozitave të Ligjit në fuqi për shpronësim në Kosovë;

1.5. **Administrim** - Menaxhim, mbrojtje, ruajtje dhe promovim të Kompleksit Memorial

"Adem Jashari" në Prekaz në përputhje me ligjet përkatëse dhe aktet nënligjore në fuqi;

1.6. **Agjencia** - Agjencia për Menaxhimin e Komplekseve Memoriale të Kosovës, e themeluar me Ligj;

1.7. **Menaxhim** - Aktivitetet e koordinuara për të udhëhequr, administruar dhe mirëmbajtur Kompleksin Memorial "Adem Jashari" në Prekaz;

1.8. **Financim** - Mjetet e destinuara për financimin e projektit të Kompleksit memorial "Adem Jashari" në Prekaz, shpronësimin e pronave dhe mirëmbajtjen e Kompleksit Memorial "Adem Jashari" në Prekaz, në përputhje me ligjet përkatëse, të ndara nga buxheti i Republikës së Kosovës;

1.9. **Manifestimet** - Organizimi me rastin e shënimit të datave të rëndësishme kombëtare dhe shtetërore, të cilat në përputhje me këtë ligj, mbahen në hapësirat e Kompleksit Memorial "Adem Jashari" në Prekaz;

1.10. **UÇK** - Ushtria Çlirimtare e Kosovës;

1.11. **FSK** - Forca e Sigurisë së Kosovës;

1.12. **Garda ceremoniale** - njësi e veçantë në kuadër të Forcës së Sigurisë së Kosovës (FSK).

KAPITULLI II

SHPALLJA E KOMPLEKSIT MEMORIAL "ADEM JASHARI" NË PREKAZ ZONË E VEÇANTË ME INTERES SHTETËROR DHE KOMBËTAR

Neni 3

Shpallja e Kompleksit Memorial "Adem Jashari" në Prekaz zonë e veçantë me interes shtetëror dhe kombëtar

1. Duke marrë parasysh rolin dhe rëndësinë e veçantë të luftës së Ushtrisë Çlirimtare të Kosovës (UÇK), kontributin e Komandantit Legjendar Adem Jasharit dhe të familjes së tij për lirinë dhe pavarësinë e Kosovës, Kompleksi Memorial "Adem Jashari" në fshatin Prekaz, Komuna e Skenderajt, shpallet "Zonë e veçantë me interes shtetëror dhe kombëtar.

2. Kompleksi Memorial "Adem Jashari" në Prekaz dhe zona e tij, e përcaktuar sipas këtij ligji dhe Ligjit për Trashëgimi Kulturore, ka status të mbrojtjes së përhershme.

Neni 4

Hapësira e zonës së veçantë

1. Kompleksi Memorial "Adem Jashari" në Prekaz përfshinë hapësirën e varrezave të dëshmorëve të lagjes Jashari, objektet nga të cilat është bërë rezistenca e armatosur, shtëpitë dhe objektet përcjellëse të kësaj familjeje, Lagjen Jasharaj, Lagjen nr.3 të qytetit të Skenderajt, zonën e ish fabrikës së municionit, një pjesë të Prekazit të Epërm; gjithsej katërqindpesëdhjetë

hektarë (450 ha) sipas planit ideor për Kompleksin Memorial "Adem Jashari" në Prekaz", të hartuar nga grupi i ekspertëve, e në përputhje me sipërfaqen e përcaktuar me ligjet në fuqi.

2. Hapësira nga paragrafi 1. i këtij neni dhe sipërfaqja e plotë që përfshin Kompleksin Memorial "Adem Jashari" në Prekaz, përcaktohet sipas Ligjit për Planifikimin Hapësinor dhe Ligjit përkatës që rregullon aspektet e trashëgimisë kulturore dhe historike.

KAPITULLI III

PROJEKTI PËR KOMPLEKSIN MEMORIAL "ADEM JASHARI" NË PREKAZ

Neni 5

Projekti për Kompleksin Memorial "Adem Jashari" në Prekaz

1. Kompleksi Memorial "Adem Jashari" në Prekaz, do të realizohet sipas Projektit, i cili përzgjidhet në bazë të shpalljes së hapur dhe publike. Projekti duhet që, të shprehë frymën e përcaktuar me paragrafin 1. të nenit 3 të këtij ligji dhe të përmbajë: pjesën e varrezave, konservimin e Kullave të rezistencës dhe bunkerit, objektin e informacionit, amfiteatrin veror bashkë me objekte përcjellëse të tij, muzeun, shtatoren e Adem Jasharit, obeliskun, objektin për Gardën ceremoniale të FSK-së, vend parkingun, parkun e Kompleksit Memorial "Adem Jashari" në Prekaz, zhvendosjen e disa shtëpive të lagjes Jashari përfshi edhe shtëpitë e familjes Jashari dhe objekte tjera të nevojshme.

2. Përzgjedhjen e projektit për implementim konform këtij ligji, e bën Komiteti Ndërmintor i cili themelohet me vendim të Qeverisë.

3. Komiteti nga paragrafi 2. i këtij neni përbëhet nga: Zyra e Kryeministrit kryesues i Komitetit, Ministria e Kulturës, Rinisë dhe Sportit, Ministria e Mjedisit dhe Planifikimit Hapësinor, Ministria e Infrastrukturës, Ministria e Tregtisë dhe Industrisë, Ministria e Punës dhe Mirëqenies Sociale, Agjencia për Menaxhimin e Komplekseve Memoriale të Kosovës, Muzeu i Kosovës, Instituti i Historisë, Instituti Albanologjik, Komuna e Skenderajt, Përfaqësuesi i Familjes Jashari, Përfaqësuesi i Shoqatës së Arkitektëve dhe Përfaqësuesi i OVL të UÇK-së.

4. Me qëllim të përmbushjes së rolit të vet, të përcaktuar sipas paragrafit 2. të këtij neni, Komiteti Ndërmintor mund të angazhojë edhe ekspertë të fushave të tjera vendorë apo ndërkombëtarë në cilësinë e këshilltarëve të jashtëm.

5. Me propozimin e Komitetit Ndërmintor, Qeveria vendos për kriteret, kushtet për shpalljen e konkursit si dhe procedurat e aplikimit të përzgjedhjes së projektit. Pas miratimit të tyre nga Qeveria, Komiteti Ndërmintor obligohet për zbatimin e tyre.

6. Agjencia për Menaxhimin e Komplekseve Memoriale të Kosovës, është autoritet për lidhjen e Kontratës me Kompaninë/Zyrën fituese dhe në bashkëpunim me Institucionet e Republikës së Kosovës, specifikon në mënyrë të veçantë kushtet dhe kriteret e saj, si dhe afatet kohore për finalizimin e saj, në pajtim me kriteret, kushtet shpalljen e konkursit si dhe procedurat e aplikimit të përzgjedhjes së projektit të propozuara nga Komiteti Ndërmintor dhe të miratuara nga Qeveria.

7. Komiteti Ndërmintor i themeluar në pajtim me këtë nen, do të përfundojë mandatin e tij me përfundimin e implementimit të projektit për Kompleksin Memorial "Adem Jashari" në Prekaz. Ai do t'i dorëzohet Agjencisë për Menaxhimin e Komplekseve Memoriale të Kosovës në pajtim me mandatin e tij ligjor.

Neni 6**Realizimi i projektit për ndërtimin e Kompleksit Memorial "Adem Jashari" në Prekaz**

1. Komiteti Ndërmënor nga neni 5 i këtij ligji është kompetent për përzgjedhjen e Komisionit të ekspertëve i cili përbëhet prej së paku tre (3) ekspertëve dhe i cili do ta bëjë përzgjedhjen e operatorit për realizimin e projektit si dhe kompanisë së specializuar për mbikëqyrje të realizimit të punimeve nga ana e operatorit të përzgjedhur, në pajtim me kriteret, kushtet për shpalljen e konkursit si dhe procedurat e aplikimit të përzgjedhjes së projektit të propozuara nga Komiteti Ndërmënor dhe të miratuara nga Qeveria.

2. Komisioni i përcaktuar me paragrafin 1. të këtij neni do ta bëjë pranimin përfundimtar teknik të realizimit të punimeve.

Neni 7**Shpronësimi i paluajtshmërive me qëllim të ndërtimit të Kompleksit Memorial "Adem Jashari" në Prekaz**

1. Me qëllim të ndërtimit dhe funksionalitetit të plotë të Kompleksit Memorial "Adem Jashari" në Prekaz, do të bëhet shpronësimi i të gjitha pronave dhe objekteve ndërtimore, të cilat gjenden në hapësirën e përcaktuar me paragrafin 1. të nenit 4 të këtij ligji dhe që nevojiten për realizimin e këtij projekti.

2. Shpronësimi do të bëhet konform dispozitave të Ligjit në fuqi për shpronësimin.

3. Autoritetet kompetente, në bashkëpunim me përfaqësuesit e familjeve Jasharaj në Prekaz, do të përcaktojnë në veçanti, mënyrën dhe kushtet për zhvendosjen e shtëpive dhe objekteve të tjera duke siguruar që e njëjta të bëhet, sipas legjislacionit në fuqi dhe në përputhje me Planin Hapësiror për Zonën e Veçantë.

KAPITULLI IV**MANIFESTIMET BRENDË HAPËSIRAVE TË KOMPLEKSIT MEMORIAL "ADEM JASHARI" NË PREKAZ****Neni 8****Organizimi i manifestimeve shtetërore**

1. Në hapësirën e Kompleksit Memorial "Adem Jashari" në **Prekaz**, nga ana e institucioneve të Republikës së Kosovës, mund të organizohen tubime dhe aktivitete përkujtimore, shënimi i datave shtetërore, historike, e të tjera me rëndësi kombëtare.

2. Të gjitha Manifestimet, të cilat lidhen me datat e shënuara shtetërore dhe historike të Republikës së Kosovës dhe qytetarëve të sajë, në hapësirat e Kompleksit Memorial "**Adem Jashari**" në **Prekaz**, organizohen nën patronatin e Qeverisë së Republikës së Kosovës.

Neni 9**Manifestimi "Epopeja e UÇK-së"**

1. Manifestimi "Epopeja e Ushtrisë Çlirimtare të Kosovës" do të organizohet për çdo vit, në datat: 5, 6 dhe 7 mars.

2. Qeveria e Republikës së Kosovës, cakton këshillin organizativ, në përbërje të të cilit do të jenë edhe Komandanti i FSK-së dhe Drejtori i Agjencisë për menaxhimin e komplekseve memorialë të Kosovës.

3. Këshilli do të jetë përgjegjës për mënyrën dhe format e organizimit të këtij Manifestimi.

Neni 10

Vizitat në Kompleksin Memorial "Adem Jashari" në Prekaz

Me propozim të Agjencisë për Menaxhimin e Komplekseve Memoriale të Kosovës, Qeveria miraton aktin nënligjor për rregullat dhe mënyrën e sjelljes së vizitorëve në hapësirat e Kompleksit Memorial "Adem Jashari" në Prekaz.

Neni 11

Aktivitetet e ndaluara në Kompleksin Memorial "Adem Jashari" në Prekaz

1. Në Kompleksin Memorial "Adem Jashari" në Prekaz ndalohet çdo aktivitet me karakter politik apo aktivitet tjetër që është në kundërshtim me qëllimin e këtij ligji.

2. Agjencia për Menaxhimin e Komplekseve Memoriale të Kosovës është përgjegjëse për sigurimin dhe mbrojtjen e Kompleksit Memorial "Adem Jashari" në Prekaz, nga organizimet apo manifestimet, në kundërshtim me paragrafin 1. të këtij neni.

KAPITULLI V

GARDA CEREMONIALE

Neni 12

Garda ceremoniale

1. Pjesëtarët e Gardës Ceremoniale të FSK-së do të vendosen në mënyrë permanente në objektin e veçantë të Kompleksit Memorial "Adem Jashari" në Prekaz dhe do të shërbejnë si "Roje Nderi".

2. Angazhimi ceremonial i pjesëtareve të kësaj njësie do të bëhet në rastet e manifestimeve shtetërore dhe manifestimeve të tjera të përcaktuara me rregullat protokollare të shtetit.

KAPITULLI VI

MBIKQYRJA, PËRKUJDESI DHE MIRËMBAJTJA

Neni 13

Autoriteti kompetent

1. Mbikëqyrja, përkujdesja si dhe mirëmbajtja e Kompleksit Memorial "Adem Jashari" në Prekaz, bëhet nga Agjencia për Menaxhimin e Komplekseve Memoriale të Kosovës, në përputhje me Ligjin.

2. Agjencia për Menaxhimin e Komplekseve Memorialë të Kosovës në përputhje me ligjin nxjerr planin për menaxhimin e Kompleksit Memorial "Adem Jashari" në Prekaz.

3. Ruajtja, mbrojtja dhe promovimi i Kompleksit Memorial "Adem Jashari" në Prekaz bëhet në përputhje me Ligjin për Trashëgimi Kulturor.

KAPITULLI VII FINANCIMI DHE MBESHTETJA FINANCIARE

Neni 14 Financimi

1. Mjetet e nevojshme për zbatimin e këtij ligji do të ndahen nga buxheti i Republikës së Kosovës dhe donacionet e ndryshme.

2. Mjetet e mbledhura në formë donacioni apo mënyra tjera për Kompleksin Memorial "Adem Jashari" në Prekaz, derdhen në buxhetin e Republikës së Kosovës, të cilat më pastaj trajtohen sipas legjislacionit në fuqi.

KAPITULLI VIII DISPOZITAT KALIMTARE DHE PËRFUNDIMTARE

Neni 15 Aktet nënligjore

Aktet nënligjore të parapara me këtë ligj, propozohen nga Agjencia për Menaxhimin e Komplekseve Memoriale të Kosovës dhe miratohen nga Qeveria në afat prej tre (3) muaj nga dita e hyrjes në fuqi të këtij ligji.

Neni 16 Dispozitat shfuqizuese

Me hyrjen në fuqi të këtij ligji, shfuqizohet Ligji nr. 2004/39 për Shpalljen e Kompleksit Përkujtimor "Adem Jashari" në Prekaz me interes të veçantë kombëtar.

Neni 17 Hyrja në fuqi

Ky Ligj hyn në fuqi pesëmbëdhjetë (15) ditë pas publikimit në Gazetën Zyrtare të Republikës së Kosovës.

**Ligji Nr. 06/L-059
18 tetor 2018**

Shpallur me dekreten Nr. DL-051-2018, datë 06.11.2018 nga Presidenti i Republikës së Kosovës Hashim Thaçi